

四庫全書

集部

欽定四庫全書

集部

遺山集卷三  
四

詳校官中書<sub>臣</sub>沈颺

主事<sub>臣</sub>呂雲棟覆勘

總校官編修<sub>臣</sub>倉聖脉

校對官中書<sub>臣</sub>葉蘭

謄錄監生<sub>臣</sub>任卬宣

欽定四庫全書

遺山集卷三

金 元好問 撰

七言古詩

虞坂行

丙子夏五月將南渡河  
道出虞坂有感而作

虞坂盤盤上青石石上車蹤深一尺當時騏驥知奈何  
千古英雄淚橫臆龍蟠於泥易所歎麟非其時聖為泣  
玄龜竟墮余且網老鳳常飢竹花實天生神物似有意  
驗以乖逢知未必若論美好是不祥正使不逢何足惜

孫陽騏驎不竝世百萬億中時有一乃知此物非不逢  
轅下一鳴人已識我行坂路多閱馬敢謂羣空如異北  
孫陽已矣誰汝知努力鹽車莫稱屈

畫馬為邢將軍賦

大宛城下戰骨滿駑駘入漢龍種藏將軍此紙何處得  
便覺房駟無光芒人中馬中兩勍敵天門鴈門皆戰場  
并州父老應相望早晚旌旗上太行

秋蠶

室人篋中無寸縷一箔秋蠶課諸女朝來飼却上馬桑  
隔簇仍聞竹間雨阿容阿璋墨滿面畫徹灰城前致語  
上無蒼蠅下無鼠作蠶直須如瓮許東家追胥守機杼  
有桑有稅吾猶汝官家恰少一絢絲未到打門先自舉

南溪

南溪酒熟清而醇北溪梅花發興新前年去年花下醉  
今年冷落花應嗔梅花娟娟如靜女寂寞甘與荒山隣  
詩人愛花山亦好幽林穹谷生陽春風鬟我我一尺雲

芳香幽卧如相親  
山堂夜半北風惡  
一點相思愁殺人

送郝講師住崇福宮

郝平晉人

大方之家幾知津  
郝君七十老斲輪  
書文五車喙三尺  
劇談混沌今猶神  
太玄博士為絕倒  
君言夸矣天公嗔  
長安冠蓋羅青雲  
洛陽車馬爭紅塵  
怪君掉頭不肯住  
寂寞來作由東隣  
崧高維岳古所秩  
三十六帝有外臣  
玄都石壇待颺馭  
宮殿突兀松輪囷  
上界仙人鄧雲山  
洞天治所名司真  
蓬萊方丈去不遠  
明星玉女時相親

瑤華可擷蘭可紉煙霞永隔塵中人黃鵠一去不復返  
白鷗萬里誰能馴為我殷勤謝鄧君玉華歲晚當平分

范寬秦川圖

張伯玉後同  
麻徵君知幾賦

亂山如馬爭欲前細路起伏蛇蜿蜒秦川之圖范寬筆  
來從米家書畫船變化開闔天機全濃澹覆露清而妍  
雲興霞蔚幾千里着我如在我峴巔西山盤盤天與連  
九點盡得齊州煙浮雲未清白日晚矯首四顧心茫然  
全秦天地一大物雷雨瀕洞龍頭軒因山分勢合水力

眼底廓廓無齊燕我知寬也不辨此渠寧有筆如脩椽  
紫髯落落西溪君長劒倚天冠切雲望之見之不可親  
元龍未除湖海氣李白豈是蓬蒿人愛君恨不識君早

乃今得子胷中秦作詩一笑君應聞

予七年前過鄆城伯玉知予來而都

無賓主意予亦偃蹇而去爾後雖願交而髯歿矣未嘗  
不以為恨也今日子思兄弟出此圖求予賦詩酒惡無  
聊中勉為賦此畫本米元章家物有韓子蒼題名元章  
以為中立而元暉以為中正以予觀之此特張髯胸中  
物耳知者當不以吾言為過云

赤壁圖



馬蹄一蹴荆門空鼓聲怒與江流東曹瞞老去不解事  
悞認孫郎作阿琮孫郎矯矯人中龍顧盼叱咤生雲風  
疾雷破山出大火旗幟北捲天為紅至今圖畫見赤壁  
髣髴燒處留餘蹤令人長憶眉山公載酒夜俯馮夷宮  
事殊興極憂思集天澹雲間今古同得意江山在眼中  
凡今誰是出羣雄可憐當日周公瑾憔悴黃州一禿翁  
寄荅溪南詩老辛愿敬之

五年不喚溪南渡日夕心馳洛西路山中今日見君詩

惆悵良辰又相悞龍蛇大澤變風景虎豹天門鬱煙霧  
丈夫不合把鉏犁青鬢無情忽衰素平泉漫作窮愁志  
笠澤休題自憐賦長安正有五侯鯖醢誰能作樓護  
青燈老屋深蓬蒿蝙蝠掠面莎鷄號劒歌夜半激悲壯  
松風萬壑翻雲濤區區墓上曹征西我知慚媿王東皐  
人生只有一杯酒螟蛉螺贏安能豪

西園

興定庚辰  
八月中作

西園老樹搖清秋畫船載酒芳華遊登山臨水祛煩憂

物色無端生暮愁百年此地旃車發易水迢迢鴈行沒  
梁門回望繡成堆滿面黃沙哭燕月熒熒一炬殊可憐  
膏血再變為灰煙富貴已經春夢後典型猶見靖康前  
當時三山初奏功三山宮闕雲錦重壁月瓊枝春色裏  
畫欄桂樹雨聲中秋山秋水今猶昔漠漠荒煙送斜日  
銅人携出露槃來人生無情淚沾臆麗川亭上省年芳  
更為清歌盡此觴千古是非同一笑不須作賦擬阿房

愚軒為趙宜之賦

心生心化誰搏控舉世倏倏皆大夢百年只辦作朝三  
爭識羣狙先汝弄人人具此清淨眼妄醫無根嗟自種  
天機嗜欲涇渭雜道念紛華鄒魯闕令人却澹愚軒愚  
一蹴藩籬開廓空去聲愚軒虛室久生白掌上精真元自  
洞氣從神火俱長物豈有古方傳魯宋人言此眼本無  
負死恨冥行人所共智愚何預阿堵中或者枯槔賢抱  
瓮病瘖能指跛能履眉睫雖存寧復動我云俗士蔽一  
曲全笑不全從古衆渠儂六鑿日相攘內不錙銖徒外

重守宮緣壁兮覆射懸甌如輪規命中天和一洩不知  
止膏火自焚良可痛從教目比方相多纔與瞽師論伯  
仲先生真是有道者老境一愚聊自送五官止廢而神  
行就令有眼將無用寄謝諸方五味禪葛藤莫作金鎚  
頌

雙峰競秀圖為叅政楊侍郎賦

江烟霏霏雲拂石山木蕭蕭山鬼泣江岸人家失南北  
兩峯突兀何許來元氣淋漓洗秋碧畫家晴景費經營

共愛移山入杳冥安得北風吹雨去倚天長劒看崢嶸

西窓

西窓鳥聲千種好樹陰離離動微風青山滿前掩書坐  
欲話懷抱無人同花枝不笑綠髮改尊酒自與黃金空  
少年樂事揔消歇落日澹澹天無窮

二十五日鶴

九龍崗上玄元祠人言尊像神所遺年年二月降靈鶴  
來無定數有定期城頭曉露生新警萬首望穿雲際影

不知濁世誰下臨只許霜毛見脩整石壇花落松風冷  
戛然長鳴人語定百年鰲老誇見聞萬里黃冠赴靈應  
只從游騎突重圍城郭併與人民非可憐侈殿荒墟裏  
無復當年丁令威

聞欽叔在華下

翰林仙人詩酒豪平生嵇阮參遊遨山中草棘滿霜雪  
可惜渠家宮錦袍聞君忍飢讀離騷思之不見心為勞  
舉頭西望忽大笑太華落洛長庚高

閻商卿還山中

阿卿去月從我來今日西山成獨往野人不是城中物  
澗飲巖棲夢餘想翰林濕新爆竹聲待詔履穿沾雪行  
蘭臺從事更閑冷文書如山白髮生孤燈靜照寒窓宿  
北風夜半歌黃鵠田家閉門風雪深梅花開時酒應熟  
半世虛名不療貧棲遲零落百酸辛憑君莫向山中說  
白石清泉笑殺人

女几山避兵送李長源歸關中



山骨稜稜雪花白北風不貸單衣客與君此別欲何言  
若箇男兒不湮阨相濡相煦尚可活轆釜何曾厭求索  
從知鮫鱷無隱鱗芥視三山需一擘自古飢腸出奇策  
漢廷諸公必動色見君軒蓋長安陌

雪後招隣舍王贊子襄飲

去年春旱百日強小麥半熟雨作霜青山無情不留客  
單衣北風官路長遺山山人伎倆拙食貧口衆留他鄉  
五車載書不堪煮兩都覓官自取忙無端學術與時背

如瞽失相徒倭倭今年得田昆水陽積年勞苦似欲償  
隣牆有竹山更好下田宜秣稻亦良已開長溝掩烏茅  
稍學老圃分紅薑宋公能詩雅好客勸我移家來水旁  
一閑入手豈易得夢中我馬猶玄黃君不見并州少年  
作軒昂鷄鳴起舞望八荒夜如何其夜未央賣刀買犢  
未厭早腰金騎鶴非所望河南冬來已三白土膏墳起  
如蜂房崧山東頭玉旆出父老知是豐年祥南溪酒熟  
梅花香高聲為喚牆東王便當過我取一醉聽歌長安

金鳳凰

鄰舍宋可字千之隱君子也并州少年謂李汾長源長安金鳳凰者齊梁間田舍兒所歌

半山亭招仲梁飲

孤城鬱鬱山四周外人乍到如纍囚  
半山亭前浙江水只可與君消百憂  
江山百年有此客雲樹六月生涼秋  
世上紅塵爭白日一邱一壑去來休

鄧州城樓

鄧州城下湍

音專

水流鄧州城隅多古丘隆中布衣不復

見浮雲西北空悠悠長鯨駕空海波立  
老鶴叫月蒼煙

愁自古江山感游子今人誰解賦登樓

宛丘嘆

秦陽陂頭人迹絕荻花茫茫白於雪當年萬家河朔來  
畫出牛頭入租帖蒼髯長官錯料事下考大笑陽城拙  
至今三老背腫青死為逋懸出膏血君不見劉君宰葉  
海內稱饑摩寒拊哀孤惻碑前千人萬人泣父老夢見  
如平生冰霜紈袴渠有策如我碌碌當何成荒田滿眼  
人得耕詔書已復三年征早晚林間見鷄犬一犁春雨

麥青青

髯李令南陽配流民以牛頭租迫而逝者餘萬家劉雲卿御史宰葉除逝戶稅三萬斛百姓為

之立碑頌德賢不肖用心相遠如此李之後十年予為此縣大為逋懸所困辛卯七月農司檄予按秦陽陂田感而賦詩李與劉皆家宛丘故以宛丘嘆命篇

### 游黃華山

黃華水簾天下絕我初聞之雪溪翁丹霞翠壁高歡宮  
銀河下濯青芙蓉昨朝一游亦偶爾更覺摹寫難為功  
是時氣節已三月山木赤立無春容湍聲洶洶轉絕壑  
雪氣凜凜隨陰風懸流千丈忽當眼芥蒂一洗平生胸

雷公怒擊散飛電日脚倒射垂長虹驪珠百斛供一瀉  
海藏翻倒愁龍公輕明圓轉不相礙變見融結誰為雄  
歸來心魄為動蕩曉夢月落春山空手中仙人九節杖  
每恨勝景不得窮携壺重來岩下宿道人已約山櫻紅

巨然松吟萬壑圖

胷中刺鯁無九澤畫裏風煙纔一漚阿師定有維摩手  
斷取江山著筆頭石林蒼蒼崖寺古銀河浩浩松聲秋  
方外賞音誰具眼莫將輕比李營丘

密公寶章小集

天東長白大寶幢天河發源導三江有木蔽映山朝陽  
云誰巢者雛鳳凰雲間吐氣日五色百鳥不敢言文章  
名都盤盤魏大梁黃金甲第羅康莊王家書絕畫亦絕  
欲與中秘論低昂密公書院無絲簧寔明几潔凝幽香  
元光以後門鑰廢文士稍得連壺觴客來喜色浮清揚  
典衣置酒餘空箱生平俊氣不易降眼中俗物都茫茫  
淵明素琴嵇阮酒妙意所寄誰能量在昔武元握乾綱

扶桑為弓射八荒獵取大國如驅羊

取一作兩

民風朴魯資

鷲彊文洽未及武尅剛興陵之孫越王子天以人瑞歸

明昌十三執經侍帝傍十八健筆陵阿房撐腸文字五

千卷靈臺架構森鋪張高陽苗裔襲衆芳胡不置之貢

玉堂袖中正有活國手地下纔得脩文郎悲風蕭蕭吹

白楊邱山零落可憐傷承平故態眇猶在拂拭寶墨生

輝光恰似如庵連榻坐一甌春露澹相忘

明昌寶玩羣玉中秘內府

圖書印也越邱有柳公權紫絲鞋歐率更海上楊疑武乞花等帖然獨推元章華佗為古今絕筆宋畫譜山水



以李成為第一國朝張太師浩然王內翰子端奉旨品  
第書畫謂成筆意繁碎有畫史氣象次之荆關范許之  
下密公識賞超詣亦以此論為公郭乾暉崔棘公以為  
當在太古無上唐以來諸人筆虛筆實皆非其比故子  
詩及之擣軒公自號也又所居有如庵詩集號如庵小  
簾越王諸子惟擣軒貧甚典衣沽酒之句蓋實錄云甲  
午三月二十有一日為輔之  
書于聊城至覺寺之寓居

### 荆棘中杏花

牆東荒蹊抱村斜荆棘狼藉盤根芽何年丹杏此留種  
小紅濺濺爭春華野人慣見謾不省獨有詩客來咨嗟  
天真不到鈿粉筆富艷自是宮闌花曲池芳逕非宿昔

蒼苔濁酒同天涯京師惜花如惜玉曉擔賣徹東西家  
杏花看紅不省白十日忙殺遊春車誰家園亭有此樹  
鄭重已着重幃遮阿嬌新寵貯金屋明妃遠嫁愁清笳  
落花紫簾拂床席亦有飄泊沾泥沙天公無心物自物  
得意未用相陵誇黃昏人歸花不語唯有落月啼栖鴉

太白獨酌圖

宣和所藏  
李伯時筆

謫仙去世三百年海中鯨魚渺翩翩豈知龍眠天馬筆  
忽有玉樹秋風前金鑾歸來身散僊世事悠悠白髮邊

會稽賀老何處在千里名山入酒船清景已隨詩句盡  
風流合向畫圖傳往時長安酒家眠焦遂不狂張不顛  
想得三更風露下醉和江月弄江煙

松上幽人圖

宋宗婦曹夫人仲婉所  
畫上有曹道冲題詩

秋風謾謾松樹枝仙人骨輕雲一絲不飲不食玉雪姿  
竹宮月夕頻望祠竟不下視齋房乏人間女手乃得之  
眼中擾擾昨暮兒畫圖獨在羲皇時予懷渺兮幽林思  
送張君美往南中

南朝辭臣北朝客棲遲零落無顏色陽平城邊握君手  
不似銅駝洛陽陌去年春風吹鴈迴今年鴈逐秋風來  
春風秋風鴈聲裏行人日暮心悠哉長江大浪金山下  
吳兒舟舫疾於馬西湖十月賞風煙想得新詩更瀟灑  
戲題新居二十韻

去冬作舍誰資助縣侯雅以平原故賢郎檢視日復日  
規制從頭盡牢固南風一夕怪事發突兀赭垣殘半柱  
乞漿得酒過初望曲突徙薪忘後慮長淮千里燕巢林

明月一枝烏遶樹東家老屋西北走衆木枝撐留少住  
由來馬隊非講肆况與彘牢通過路聚廬託處何暇擇  
重為主人推獎悞夏秋之交十月陰抱被倚門愁旦暮  
君問新居在何許只去火餘纔數步學宮分地與間冷  
使館有牆遮雜汙就中此宅尤費手官給工材半傭雇  
十寒一暴半載強纔得安床置鐙釜紛紛暗被兒女笑  
老虎般彪今幾度胸中廣廈千萬間天地一身無着處  
北來衣冠日枯槁十九桃符傍門戶乾坤血肉得此身

剩有把茅能勿懼上方下比良易見好惡且當隨所遇  
仰看片瓦聊自賀疾過岩牆寧反顧合歡明日召諸隣  
狼籍盃盤從飽吐

贈蕭鍊師公弼

吾家阿京愛公弼吾家澤兄敬公弼半生夢與公弼游  
豈意相逢在今日春風和氣在眉宇玉壺冰鑑藏胸臆  
人間萬事君自知未必君材人盡識蘇門水木無纖埃  
聞君家近公和臺仙家近日多官府黃帽青鞋歸去來

時汰佛老家  
甚急故云

送弋唐佐董彥寬南歸

且為潞府諸公一笑

河汾續經名自重附會人嫌迫周孔史臣補傳久已出  
浮議至今猶洶洶薛叔文志誰所傳貴甚竹書開汲冢  
沁州破後石故在為礎為砮吾亦恐暑涂十日來一觀  
面色為鰲足為腫淡公淡癖何所笑但笑弋卿堅又勇  
自言浪走固無益遠勝閉門親細冗摩挲石刻喜不勝  
忘却崎嶇在岡隴潞人本淡新有社淡事重重非一種

有人六月訪琴材不為留難仍從史懸知蠟本入渠手  
四座色揚神為竦他時記籍社中人流外更須增一董

蕭仲植長史齋

脩武作

張顛飲豪傾四座脫帽狂呼誰敢和南宗北宗知幾人  
醉眼紛紛飛鳥過是公技進不名技元氣淋漓隨咳唾  
偶然捉筆本無意自有龍騫并虎卧當時誰有戰國策  
長史帖云借戰國策可付之凡七字門外雷車忽驚墮天星無數不知名  
色正芒寒纔七箇蕭郎家世陵谷後爭信空囊蓄奇貨



蕭齋故事今復舉未怕秋風吹屋破護持有物世共喜  
不獨一時為子賀藏舟夜壑未厭深隄備有人來倚拖

送宋省叅并寄潞府諸人

茅齋團團蝸殼大苦被傍人嘲塞破官豪眼孔十萬緡  
未與書生供一唾長衫只辦包瘦骨故紙何緣變奇貨  
不因三致大耳兒老雪屯門甘凍卧國中腐鼠凡幾嚇  
玉上青蠅非一箇荆人羨璞荆之招君足幸存仍可賀  
雲間太行青在眼上客歸來傾四座因君寄問社中人

前日淡公行復過

覓神霄道士古銅爵

雷章著土紛朱碧秋茵春蒲人不識若非儀狄墓中來  
應自杜康祠下得古人或得酒之傳摸索飲器流饒涎  
巧偷豪奪吾何敢他日酬君九府錢

賦澤人郭唐臣所藏山谷洮石研

研有銘云王將軍為國開

臨洮有司歲餽可會者六百鉅萬其於中國得用者此研材也研作壁水樣

舊聞鸚鵡曾化石不數礪鵲能瑩刀縣官歲費六百萬

纔得此研來臨洮玄雲膚寸天下徧壁水直上文星高  
辭翰今誰江夏筆三錢無用試鷄毛

贈休糧張鍊師

金砂霧散風雨疾一點黃金鑄秋橘中林宴坐人不知  
野鹿銜花蜂課蜜富兒盤饌羅羶葷擾擾飛蠅復聚蚊  
見說西山好薇蕨一枝青竹願隨君

天井關

石磴盤盤積如鐵牛領成創馬蹄穴老天與世不相關

玄聖栖栖此迴轍二十年前走

去聲

大梁當時塵土困名

場山頭千尺枯松樹又見單車下太行自笑道塗頭白

了依然直北有羊腸

遺山集卷三

欽定四庫全書

遺山集卷四

金 元好問 撰

七言古詩

讀書山雪中

前年望歸歸不得去年中途脚無力  
殘生何意有今年  
突兀家山墮眼前東家西家百壺酒  
主人捧觴客長壽  
先生醉袖挽春迴萬落千村滿花柳  
山靈為渠也放顛  
世界幻入兜羅綿似嫌衣錦太寒乞  
別作玉屑粧山川

人言少微照鄉井准備黃雲三萬頃何人辦作陳瑩中

來與先生共炊餅

陳先生貶官後荅京師人書云南州有何事今年好雪明年炊餅大耳

題商孟卿家明皇合曲圖

海棠一株春一國燕燕鶯鶯作寒食千古萬古開元日

三郎搦管仰面吹天公大笑嗔不得寧王天人玉不如

番綽樂句不可無宮腰不按羽衣譜疾舞底用牧豬奴

風聲水聲闕清都夢中令人羨華胥何時却竝宮牆聽

不恨將身作李暮

過晉陽故城書事

惠遠祠前晉溪水翠葉銀花清見底水上西山如卧屏  
鬱鬱蒼蒼三百里中原北門形勢雄想見城闕雲煙中  
望川亭上閱今古但有麥浪搖春風君不見繫舟山頭  
龍角禿白塔一擁城覆沒薛王出降民不降屋瓦亂飛  
如箭鏃汾流決入大夏門府治移著唐明村只從巨屏  
失光彩河洛幾度風煙昏東闕蒼龍西玉虎金雀觚稜  
上雲雨不論民居與官府仙佛所廬餘百所鬼役天財

千萬古爭教一炬成焦土至今父老哭向天死恨河南  
往來苦南人鬼巫好襪祥萬夫畚鍤開連岡官街十字  
改丁字釘去聲破并州渠亦亡幾時却到承平了重看官  
家築晉陽

蟾池

老蟾食月飽復吐天公一目頻年瞽下界新增養蟾戶  
玉斧誰憐脩月苦郡國蟾池知幾所碧玉清流水仙府  
小蟾徐行腹如鼓大蟾張頤怒於虎渠家眉間有黃乳



膏梁大丁正須汝何人敢與月復讎疾過池頭不容語  
向來屬私今屬官從今見墓當好者爬沙即上青雲端

贈答張教授仲文

秋燈搖搖風拂席夜聞嘆聲無處覓疑作金荃怨曲蘭  
畹辭元是寒蟬月中泣世間刺綉多絕巧石竹殷紅土  
花碧窮愁入骨死不銷誰與渠儂洗寒乞東坡曾次丹  
青國天孫綠絲天女織倒鳳顛鸞金粟尺裁斷瓊綃三萬  
尺辛郎偷發金錦箱飛浸海東星斗濕醉中握手一長

嗟樂府數來今幾家剩借春風染華髮筆頭留看五雲

花

七言長詩於中獨一句九言  
韋郎有此例長吉亦有此例

高門關

高門關頭霜樹老細路千山萬山繞亂餘村落不見人

霰雪霏霏暗清曉莘川百里如掌平閑田滿眼人得耕

山中樹藝亦不惡誰遣多田知姓名許李申楊竟何得

只今唯有石灘聲

許致忠楊湯臣申伯勝李仲常名宦  
四家隱廬氏時以多田推之亂後俱

不知所  
在矣

甲辰秋洛陽得黃葵子種之南庵明年夏六月  
作花佛經所謂閻浮檀金明靜柔軟令人愛  
樂者此花可以當之因為賦長韻予方以病  
止酒故卒章及之

芳蕤浥露嬌黃濕五疊湘裙輕縠積晨粧午醉一日間  
白白紅紅揔狼籍上陽宮女要頭冠摹寫雖工破的難  
看來明淨復柔軟花中乃有閻浮檀千里移根洛陽陌  
主人不飲誰看客乞與金盃自傾側明年為渠當舉白

馬嶺

仙人臺高鶴飛度錦綉堂傾去無路人言馬嶺差可行

比似黃榆猶坦步石門木落風颼颼僕夫衣單望南州

臯落東南三百里鬢毛衰颯兩年秋

予去歲往河南遷奉亦取黃榆嶺路

雲峽并序

君璋啓事西涼占對稱旨其還也行臺公以宣

和寶石為貺奇秀溫潤信天壤間之尤物君璋

目之曰雲峽邀詞客賦詩予亦同作

石盆清冷貯秋水水面蒼煙飛不起一堆寒碧几研間  
寶氣崢嶸插箕尾中山雪浪空影像長安鸚鵡猶紈綺  
枉着奇章甲乙中槁項纔堪把耕耒不知天壤此尤物  
鬼刻神剗通有幾薰蒸似欲出泉脉瑩滑定應凝石髓  
剝裂雲華漬月秋辛苦詩僊費摹擬車箱箭筈連西東  
仇池百穴牕玲瓏飛墮不嫌靈鷲小奇探已覺太湖空  
故都喬木今如此夢想熙春百花裏膏血網船禍九州  
亡國愁顏為誰洗主人天質粹以溫天然與山作知聞

退食從容北窓卧今古起滅真浮雲

仙人王子可賦石淙有石裂電華漬

月秋之句

雲巖并序

觀州倅武伯英嶧縣人少日舉進士有詩名其  
賦剪燭刀有啼殘瘦玉蘭心吐蹴落春紅燕尾  
香之句甚為時輩所稱家故饒財第宅園亭為  
河東之冠貯書有萬卷樓嘉花珍果悉自他州  
移植為人多伎巧山水雜畫斲琴和墨皆極其

工嘗得宣和湖石一竅竅穿漏殆若神劖鬼鑿  
炷香其下則煙氣四起散布磐水上濃澹霏拂  
有煙江疊嶂之韻吾鄉衣冠家法書名畫及藏  
書之多亦有伯英相上下者伯英獨恃寶石以  
擅奇汾晉間耳興定末伯英歿於關中楊戶部  
叔玉購石得之壬辰圍城中以示予且命作詩  
危急存亡之際不暇及也乙巳冬十一月來東  
平過聖與張君之新軒而此石在焉聖與名之

曰雲巖予問石所從來聖與言夏津王帥得之  
汴梁泥塗中而以見貽予因歎一物之微經歷  
世變遷徙南北乃復為好事者之所寶玩似不  
偶然乃為詩道其故聖與三世相家以文章名  
海內其才情風調不減前世賀東山晏叔原故  
卒章以蕭閑明秀峰故事屬之

壺中九華玉屏顏紫煙著水往復還小窗虛明澹相對  
不數漢宮銅博山會稽禹穴深無底寶石偷來定山鬼



一塊寒碧殊不凡  
滿谷春雲更堪喜  
阿欣秀發見眉宇  
小杜才情淪骨髓  
摩挲不作几上看  
繚白紵青便千里  
渾沌日鑿餘空嵌  
漏天蒸濕饒峰嵐  
世外元無種香國  
海內真有補陀巖  
觀州愛玩頻湔祓  
民部平生幾薰沐  
藏舟夜壑未厭深  
竟作新軒坐中物  
一天星月入金尊  
翠射娉婷自有人  
只欠宣和鄭先覺  
為君留寫五湖真

劉遠筆

老斂力能舉玉杵  
文陣挽強猶百鈞  
惜哉變化太狡獪

嚮也褐衣今虎文宣城諸葛寂無聞前後兩劉新冊勲  
謝郎神鋒恨太雋雖然豈不超人羣三錢雞毛吐皇墳  
尖奴定能張吾軍何時酌我百壺酒為汝醉草垂天雲

狡獪變化事  
見麻姑傳

贈周良老

于公斷獄多平反高門大車在乃孫我居聊城欲二載  
喜見周叟醇而溫十年大理書上考宜有陽報如于門  
大兒書來問安否兵饑不死天所存鄭孫毛骨殊秀發

實氣鬱鬱含朝暎機聲嘔啞聒朝昏種瓠五石當酒尊  
是翁福祿知未艾昆弟和樂連株根白髮阿兄應念我  
南雲寂寞賦招魂

鴻溝全欽叔賦

劉郎著手乾坤了未害與渠分九州夸兒衣綉自楚楚  
作計豈復西鴻溝雌雄自決已無策尺寸必爭唯上流  
韓生已死言猶在千載令人笑沐猴

雪中自洛陽還嵩山

道人薄有塵外緣，迫入塵埃私自憐。  
三十六峰一茅屋，夢裡西家掠社錢。  
津津喜色見眉宇，我我青城當眼前。  
寒驢徑入風煙去，恰是梅花欲雪天。

祖唐臣愚庵

小智胠篋盜所羞，大智移國鬼與讎。  
浮生匹絹兩孟粥，心計擾擾知何求。  
青州荊州兔三窟，古人今人貉一丘。  
喚起羅池柳夫子，與君同醉訾家洲。

過井陘

北山亭亭如驛堠南山耿耿虎翹首土門東頭望井陘  
漢家風雲自奔走市人豈識英雄才金鼓一朝天上來  
此山行人萬萬古幾不磨滅隨蒿萊白鹿祠前一杯水  
蒼顏聊為洗塵埃

北岳

太茂維嶽古帝孫大朴未散真巧存乾坤自有靈境在  
地位豈合他山尊中原旌旗白日暗上階樓觀蒼煙屯  
誰能借我兩黃鵠長袖一拂玄都門

天涯山

九州上游推大鹵獨恨山形頗推魯天涯一峰今日看  
快似昂頭出環堵何年氣母此融結鬼鑿神鑱未奇古  
八窗玲瓏透朝日洞穴慘澹藏雷雨苔花錦石粲可喜  
乞與雲烟相媚嫵半空擲下金芙蓉想得飛來自玄圃  
傳聞絕頂更靈異云是清都羣玉府五雲飛步吾未能  
風袂泠泠已輕舉東州死愛華不注向在陋邦何足數  
敬亭不着謝宣城斷岸何緣比天姥酒船何時朝復暮

倒卷滹沱浣塵土喚起山靈捷石鼓漢女湘妃出歌舞

詩狂他日笑遺山飯顆不妨嘲杜甫

山有石  
鼓神祠

智仲可月下彈琴圖

莫春舞雩鼓瑟希琴語解吐胸中奇誰言手揮七絃易  
大笑虎頭真絕癡北風蕭蕭路何永流波湯湯君自知  
三尺絲桐儘堪老兒童休訝鶴書遲

常山姝生四十月能搦管作字筆意開廓有成  
人之量喜為賦詩使洛誦之

大兒小兒舞商羊東家西家捉迷藏牙牙作羣鴈鴈行  
是中乃有常山郎常山嬌嬌可憐蟲四歲未有三歲強  
黑鴈破殼自神駿黃犢放脚須跳梁只知見紙即塗抹  
誰謂轉腕能低昂渠家兩公破天荒劉輝夢靈果專場  
榮鄉亭中詩版在岐山名字香山香此郎晚出西樞房  
虎穴虎子不可當天驚地怪見落筆便合抱送中書堂  
文星煌煌照燕南青青子衿滿恒陽教官連被鳳尾詔  
瑞物多生金粟岡兒曹變化不作難何必二十始乖張



明年作字一丈大當有稜角垂光芒迴頭却看元叔綱

鼻涕過口尺許長

常山白寓齋第三子叔綱遺山之季子也

贈利州侯神童

生十四月識字予見時生二十一月識字無算

牙牙點粧杏蕾紅阿兄抱之來學宮今春學語語未正  
已能見書識名姓隨指隨讀無數重多生想曾文字中  
極知之無不足訝更恐洛誦難為功土中松粒龍爪脫  
萬牛丘山起豪末君不見黃金寶鼎翡翠青未要春官  
許衣鉢人間失却麻神童明星煌煌出蒼龍只知江陵

圖籍盡一火誰謂死草生華風遺山老子未老在見汝

吐焰如長虹

兒字金鼎

奚官牧馬圖息軒畫

曹韓畫樣出中秘燕市死骨空千金息軒筆底真龍出  
凡馬一空無古今安間自與人意熟蕭洒更覺天機深  
奚官有知應解笑世無坡仙誰賞音

紫微劉文山水為濟川賦

畫家李范真勍敵方外只今誰第一自非劉宗祭酒阜

昌孫未信僊翁輕落筆長洲遠浦各清泠萬頃風煙一  
草亭千章古木散巖谷鶴髮松姿餘典刑紙尾不須題  
姓字人人知是老人星

王右丞雪霽捕魚圖

江雲混混陰晴半沙雪離離點江岸畫中不信有天機  
細向樹林枯處看漁浦移家媿未能扁舟蕭散亦何曾  
白頭歲月黃塵底笑殺高人王右丞

跋酒門限邵和卿醉歸圖

邵伯祿  
之父

邵翁頭白甫三十高吟大醉無虛日風流若似靖南湖  
每恨聞名不相識太平村落自由身童稚扶携意更真  
醉歸圖上見顏色喜溢眉宇猶津津好看蹇驢馱我去  
與君同醉杏園春

題張彥寶陵川西溪圖

松林蕭蕭映靈宇爍石流金不知暑太平散人江表來  
自訝清涼造仙府不到西溪四十年溪光林影想依然  
當時膝上王文度五字詩成衆口傳忽見畫圖疑是夢

而今塵土浣華顛

本送字今改作浣字陵川在太行之巔蓋天壤間清涼境界也江淮太平

散人題詩東廟自己造仙府恨居民不知其樂耳此縣先君子舊治宴游西溪僕以童子侍焉彥實出此圖求賦詩感今懷昔為之愴然故篇中有及癸丑十一月三日題

汝州倅韓君德華其十祖二世相遼封魯公故

名其伯男子曰魯王父命氏古蓋有之予過

其家命魯出拜謂予言魯名矣而未有字敢

以為請予字之世公德華曰願終教之乃申

之以辭

昌黎諸韓散盧龍魯公相遼開邑封鴈行先後六侍中  
大參高文紀神功龜石穹窿與天終百年故家餘素風  
汝州有子今成童考古制名龜筮從貴以道義飭汝躬  
良璞不治凡石同貞而絕俗孰子容濟質以文介而通  
顧雖宗起其起宗魯也不慚袁氏公

壬子冬至新軒張兄聖與求為兒子阿平制名  
予名之曰琥以仲耽字之小字明復有善禱  
之義焉詩不工當令阿耽灑落誦之

阿平玉雪絕可憐皎如鶴雛下青田呼來拜客挽不前  
啼聲如聞過秦篇陳王人門漢韋賢新軒文筆尤翩翩  
大弔掛壁誰使然我知一經會有傳玄默之冬客須城  
問平之年纔五齡迺公為兒求制名兒名從虎玉與并  
仲眈為字以字行佛書舊說無空青豈知空青今有形  
紫公紫公還我明看兒着脚青雲平

世宗御書田不伐望月婆羅門引先得楚字韻  
瑤光樓前按歌舞桂樹秋香月三五白頭誰解記開元

四海歡聲沸簫鼓兩都秋色皆喬木三月阿房已焦土  
天上亦有別離情可是田郎心獨苦承平舊物霓裳譜  
寶氣暉暉映千古銀橋望極竟不歸滅沒燕鴻下平楚  
送崔夢臣北上

子真抱關買臣負薪朝奏暮召名動縉紳此有  
志之士所以自奮於昌辰者耶夢臣崔卿玉樹  
清姿土門華胄成童授學與雞俱興肆筆成書  
倚馬可待雖泌水之洋洋堪樂舜門之穆穆方



開惜歲月之虛捐欲雲霄之坐致遇順風而縱  
大壑其孰禦之登金馬而上玉堂在此行矣詩  
以勸駕序寧闕乎癸丑二月望日新興元某序  
并州書郎年少客細馬金鞭日三百生平意氣凌青雲  
未怕天山雪花白西園此日盛徐陳鳳閣鸞臺氣象新  
由來草創資潤色況復天造須經綸他日南歸吾未老  
與君同醉晉溪春

送王彥華

中朝名勝龍山冀喜色門闌得佳壻一朝天府効驅馳  
萬里青雲在平地金粟岡頭俊造多莫從人品問如何  
迂齋受學青衿日殷重遺山為拊摩東國人倫吾豈敢  
只憑月旦決巍科

李成之王彥華趙孝先以提學命見餉佳酒且  
求制名輒以詩記

子雲寂寞將誰親延之麤豪意自真君家公壻兩冰玉  
酒味自合清而醇雲腴俗士無風神紅珠女兒茜裙新

一杯香絕韻亦絕只今唯有酴醾春

劉時舉節制雲南

雲南山高去天尺漢家弦聲雷破壁九州之外更九州  
海色澄清映南極幽并豪俠喜功名咄嗟顧盼風雲生  
今年肘後印如斗過眼已覺烏蠻平諭蜀相如今老矣  
不妨銅柱有新名

贈張潤之

許年不唱龍津第人物尤難到衰世明堂他日要梗楠

造物也須論蚤計晉人稟賦例真醇兒能讀書知養親  
遺山門客富儒雅綠髮張郎名姓新莫道琴工有師法  
海山深絕解移人潤之資甚美故就其可致者而勉之  
他日學業有成老夫當以風鑒自負  
矣

許道寧寒溪古木圖

道人醉袖蟠蛟龍掃出古木牙須雄開卷飄飄來陰風  
翟卿論畫凡馬空能知畫與詩同宗解衣盤礴非衆工  
遺山筆頭有關全意匠已在風雲中留待他日不忽忽

送張書記子益從嚴相北上并序

子益省郎觀國之光從公于邁揚雄詞賦良借力於吹噓鄧禹功名本無心於祿仕詩以送別亦以趣其歸云

故家人物饒竒俊聳壑昂霄今已信康侯晝接拜寵光  
百里自應沾海潤六月貂裘風雪深天河天駟日駸駸  
莫把聲華動臺閣東方書檄要陳琳

贈別孫德謙

津橋垂楊雪花白  
挽斷春衫苦留客  
西湖一雨春意濃  
絕似銅駝洛陽陌  
湖亭轟醉卧春風  
到手金杯不放空  
鵲山一帶傷心碧  
羨殺孫郎馬首東

汾亭古意圖

堯民義皇去未遠  
日作日息天機全  
杜侯袖裏姑汾筆  
辦與南華談窅然  
廢興知經幾今昔  
淳朴別有一山川

白雲亭上秋風客  
不比僊翁甲子年

元裕以來郭熙明  
昌泰和間張公佐

皆年過八十而以山水擅名今雲中杜文華老與張郭  
年相若而畫品不下古人為侯廣道作汾亭古意橫披

灑然有塵外意為題四韻其後神仙張果生  
帝堯甲子年詩家亦傳習用之故末句有及

太原贈張彥遠

并州城邊十月末清霜稜稜風入骨因君夜話吳江春  
酒光瀲灩金杯滑閑閑騎鯨去滅沒當年愛君俊於鵲  
平生我亦識翁人惆悵流年如電抹官家新築文昌臺  
蒼生不憂墮巔崖眼看東閣奇士滿如君豈得藏蒿萊  
晨雞未鳴子當發明星煌煌大於月野夫一笑冠纓絕  
換得雲臺帖喜而賦詩

周官武臣奉朝請劍佩束縛非天真世間曾有華陀帖  
神物已化延平津米狂雄筆照萬古北宗華書纔九人  
今日雲臺見遺墨黃金牢鎖玉麒麟

鹿泉新居二十四韻

土門西邊井陘渡野日荒荒下汀樹榆關石嶺都幾程  
客夢往往迷歸路塵埃風雨半生過儘着筋骸支世故  
寧州假館又兩年未保東來不西去山城百家家有山  
觀面呈山誰一顧賣書買得呂氏園不謂金山舉相付




北崖老作土灰色擁腫形模一夸父娟娟正有小娥媚  
却立不容親杖屨就中抱犢尤峭拔望見韓山即攀附  
韓王砦頭四望闔全趙米如纔數聚眼中麾蓋天上來  
泝水鼓旗紛偃仆漢家威靈萬萬古石子連岡猶虎距  
夏秋衆壑會鹿泉浩浩湍聲瀉餘怒西南諸峯不知數  
蕩海鯤鯨尻背露霏煙空翠有無中百態陰晴變朝暮  
靈巖龍泉曾一到獨欠封龍展衰步學僊不愛徐童花  
李相書龕心所慕生平懷抱向山盡老氣崔嵬如有助

巖居枯寂朝市喧喧寂兩間差有趣得行固願留不惡  
流坎且當隨所遇何曾萬錢何用許方丈有山容下筇  
管城初無食肉相黃帽非供折腰具明年高築野史亭  
天已安排看山處多慙不及謝宣城標出敬亭天一  
柱

過劉子中新居

鄆州城隅兩茅屋市聲喧喧自幽獨春風吹盡山杏花  
只有青青一叢竹先生愛畫如惜玉練鵲翔鸞餘百軸

大兒踉蹌挾書歸土銚疎烟纔一粥微官枉負半生閒  
也着區區簿領間何時却與溪南老紫蓋山前共往還  
子中舊與溪南詩老  
辛敬之游故有下句



遺山集卷四

欽定四庫全書

集部

遺山集卷五

詳校官中書臣沈颺

主事臣呂雲棟覆勘

總校官編修臣倉聖脉

校對官中書臣葉蘭

謄錄監生臣任啣

欽定四庫全書

遺山集卷五

金 元好問 撰

雜言

去歲君遠游送仲梁出山

去歲君遠游今年客它州青天萬古一明月只與行人  
生暮愁問君游何許情多地遐今徧處處金鞭斷折騏  
驎死萬里長鴻思一舉憶初識子梁王臺清風入座無  
纖埃華嶽峰尖見秋隼金眸玉爪不凡材西園日晴花

滿烟五雲樓閣三山巔玉樹瑤林照春色青錢白壁買  
芳年三年一夢南陽道汴水迢迢入秋草拏雲心事人  
不知千首新詩怨枯槁破屋仰見星疎衾風露清匣中  
有長劍為君鳴不平泥塗久辱思一濯去去舉足皆清  
冷鄧州大帥材望雄愛客不減竒章公軍中宴酣笳鼓  
競銀燭吐焰如長虹幕中多士君又往談笑已覺南夷  
空東州春迴十月後梅華分香入春酒平生得意飲與  
京青眼高歌望君久浙江南下青汭石門細路蒼烟

屯五松平頭白日靜千山萬山如亂雲菊源不逐時事  
改芝嶺自與商顏鄰他日相思一迴首漁舟時問武陵  
人

欽謂欽叔京即京父也  
樂天書以徵之為徵

此日不足惜

此日不足惜此酒不可無頗怪昌黎公亦復為世儒天  
生至神物與人作華胥一酌舌本彊二酌燥吻濡三酌  
動高興四酌色敷腴連綿五六酌枯腸潤如酥眼花耳  
熱後萬物寄一壺十酌未渠央百觚亦奚拘人生一世



問忽若過隙駒有酒不解飲問君誰與娛君不見東家  
騎鯨李膽滿六尺軀萬言黃石策八陣夔州圖酒酣起  
舞不稱意長吁青雲指夷吾又不見西家紫髯郎老氣  
雄萬夫狂歌飲燕市擊筑聲嗚嗚倚天長劍插少室頗  
欲四海皆東湖鷹揚虎視今焉如河山永隔黃公鑪啣  
盃直待秋井塌青苔白骨憐君愚少年覓計生白須捫  
參歷井無危途榮不滿睫良區區就令一朝使得八州  
督爭似高吟大醉窮朝晡餘名安得潤枯骨四十豈不

知頭顱此日不足惜此酒不可無太虛為室月為燭醉  
倒不用春風扶

送希顏赴召西臺兼簡李汾長源

昨日游崧丘今日西臺行勞生好夢亦大少枕中馬嘶  
車鐸鳴山林之樂無虧成胡為解蘭縛塵纓蒼生望君  
須一起我知無地逃功名關中得君作金城氣象已覺  
西山平諸人誰出仲卿右一座想為相如傾風華浩蕩  
春冥冥馬頭仙掌遙相迎長安市上見李白為我一醉

秦東亭

嵩山玉鏡

玉鏡見何許今旦東山陲積雨洗昏霾旭日發光輝光  
輝奪人目灩灩如動移初如秋月圓漸如曙星微曙星  
不能久併與晨露晞此鏡何從來造化秘莫窺山精或  
寶氣恍惚令人疑誰為問岳祇山川英秀會有歸不能  
生申與甫瑞王國萬丈光芒徒爾為

虎害

北山虎有穴南山虎為羣目光如電聲如雷倚蕩起伏  
山之垠百人一飽不留骨敗衣墜絮徒紛紛空谷絕樵  
聲長路無行塵呀呀垂涎口眈眈闕城闔天地豈不仁  
社公豈不神哀哀太山婦叫斷秋空雲可憐封使君生  
不治民死食民世上無復裴將軍北平太守今何人

飲酒

江南秋泉雲液濃遼東抹利玉汁鎔柳瓢朝傾荔支綠  
螺盃暮捲珍珠紅此酒誰所留今日乃汝逢仙人一九

藥洗我芥蒂胸金沙一散風雨疾世事盡與浮雲空東  
家劉伯倫西家王無功醉鄉日月萬萬古眼中擾擾誰  
為雄人會有歸盡飲不飲所同所恨獨醒人百年枯槁  
中獨醒恨未通獨醉恨未公安得清江變醇酎盡迴天  
地入春風

送高信卿

高卿去歲山中居橡朝栗暮分猿狙今年移家入城市  
甌中生塵釜生魚文窮智亦窮五鬼更嘯呼迺翁延客

著上座兩兒已復遭抑掄三冬兔園冊收豎叫語麤濕  
薪烟滿眼破硯冰生須賣符與行藥不養堂堂軀無衣  
思南州千里走單車我嘗相夫君不是山澤臞十八學  
擊劒二十了陰符平生結交王與李袖中頗有魚鹿圖  
文武志膽誰不如不能拔劒斫蛟鱸亦當赤手降於菟  
胡為堅坐守寒饑坐令兒女悲窮途萬事糊塗酒一壺  
別時聊為鼓嚨胡中原麟鳳今如此莫道皇家結網疎

寄趙宜之

趙時在  
盧氏

大城滿豺虎小城空雀鼠可憐河朔州人掘草根官煮  
弩北人南來向何處共說莘川今樂土莘川三月春事  
忙布穀勸耕鳩喚雨舊聞抱犢山摩雲出蒼稜長林絕  
壑人迹所不到可以避世如武陵煮橡當果穀煎朮甘  
飴錫此物足以度荒歲況有麋鹿可射魚可罾自我來  
嵩前旱乾歲相仍耕田食不足又復違親朋三年西去  
心籠禽念飛騰一瓶一鉢百無累恨我不如雲水僧崧  
山幾來層不畏登不得但畏不得登洛陽一夕秋風起

羨煞吳中張季鷹

段志堅畫龍為劉鄧州賦

豬龍可豢亦可屠世人畫蛇復畫魚天飛忽入阿堅筆  
始覺衆史欺庸愚腥風萬里來白浪橫江湖一麾走海  
若再顧失天吳浩蕩明河翻尾鬣慘不濡只愁紙上出  
雷火搏控大千如此珠天生神物與化俱滅沒變見何  
所無逆鱗自古不受觸乃今縮頭隨卷舒怪得堂堂髯  
御史平生長有雨隨車



送詩人秦略簡夫歸蘇墳別業

三月不見君渴心欲生塵論文一樽酒雅道誰當陳昨  
朝見君臨水句乃知抽青配白非詩人南山明月北山  
雲恨君不作由東隣擊鮮為具非無好事者天隨杞菊  
年年新石田茅屋連蘇墳兩兒力耕足養親君詩或者  
昌晚節不應道路長逡逡白髮刀騷一幅巾豐年鄉社  
樂閑身蹇驢馳入醉鄉去袖中知有眉山春

紀子正杏園燕集

甲午  
歲

紀翁種杏城西垠千株萬株紅艷新今年寒食好天色  
曉氣鬱鬱含芳津天公自愛此花好朝薰暮染煩花神  
融霞暈雪一傾倒非烟非霧非卿雲未開何所似乳兒  
粉粧深絳唇能啼能笑癡復騃畫出百子元非真半開  
何所似里中處女東家鄰陽和入骨春思動欲語不語  
時輕顰就中爛熳尤更好五家合隊號與秦曲江江頭  
看車馬十里羅綺爭紅塵陽平一邑多詩豪主人買酒  
邀衆賓花時有成約恨少楊子張吾軍落花着衣紅纈

紛四坐慘澹傷精魂  
花開花落十日耳對花不飲花應  
嗔愛花常苦得花晚爭教行樂無  
閑身芳苞一破不更合且看錦樹  
烘殘春

送李叅軍北上

五日過居庸十日渡桑乾  
受降城北幾千里出塞入塞  
沙漫漫古來丈夫淚不灑  
別離間今朝送君行清涕留  
餘潛生女莫作王明君  
一去紫臺空珮環生男莫作班  
定遠萬里馳書望玉關  
我知驥子墮地無齊燕  
我知鴻

鵠意氣青雲端草間尺鷃亦自樂扶搖直上何勞搏一  
衣敝緼袍一飯苜蓿盤歲時壽翁媪團樂有餘歡就令  
一朝使得八州督爭似綵衣起舞春爛斑去年維陽人  
今年指天山地遠馬羈破霜重貂裘寒朔風浩浩來客  
子慘在顏扼胡嶺上一迴首未必君心如石頑君不見  
桓山烏乳哺不得須臾閑衆鷁一朝散孤雌回顧聲悲  
酸寒鴈來時八九月白頭阿母望君還

王黃華墨竹

為郭輔  
之賦

古來畫竹尊右丞東坡欽袂不敢評開元石本出摹寫  
燕市駿骨留空名亦有文湖州畫意不畫形一為坡所  
賞四海知有筴簞亭深衣幅巾老明經老死不敢言縱  
橫豈知遼江一派最後出運斤成風刃發礪雪溪仙人  
詩骨清畫筆尚餘詩典刑月中看竹寫秋影清鏡平明  
白髮生娟娟略似萱草詠落落不減叢臺行千枝萬葉  
何許來但見醉帖字欹傾君不見忠恕大篆草書法趙  
生怒虎嘖墨成至人技進不名技遊戲亦復通真靈百

年文章公主盟屏山見之踦且擎聲光舊塞天壤破議  
論今着兒曹輕有物於此鳴不平悲耶嘯耶誰汝令只  
恐破窓風雨夜怒隨雷電上青冥

汎舟大明湖

待杜子不至

長白山前繡江水展放荷花三十里看山水底山更佳  
一堆蒼烟收不起山從陽丘西來青一灣天公擲下半  
玉環大明湖上一盃酒昨日繡江眉睫間晚涼一棹東  
城渡水暗荷深若無路江妃不惜水芝香狼籍秋風與

秋露蘭襟鬱鬱散芳澤羅襪盈盈見微步晚晴一賦畫  
不成枉着風標誇白鷺我時驂鸞追散仙但見金支翠  
甃相後先眼花耳熱不稱意高唱吳歌叩兩舷喚取樊  
川搖醉筆風流聊與付他年

九月七日夢中作詩續以末後一句

桃花紅深李花白昨日成團今日折歌聲滿耳何處來  
楊柳青旗洛陽陌拊君背握君手朝鐘暮鼓無了期世  
事於人竟何有青青鏡中髮忽忽成白首六國印何如

負郭二頃田千載名不及即時一盃酒

賦邢州鵲山

去時唐山道望望鵲山背今朝西北看

平聲

奇秀益可愛

蒼茫失層疊鮮駁見縈帶浮雲自來去盡巧寧變壞吳  
粧入小筆隱隱拂殘黛城隅靜女人不知擁髮低顰如  
有待太行橫截九州半一掩一重俱有態只知天平六  
峰天下稀此山東來亦閑在烟埋雨沒今幾時殆天所  
藏予發之郭熙未足語平遠摹寫惟有常郎詩



送王亞夫舉家歸許昌

一日兩食藜藿葵三冬一褐骭與齊監河貸粟困欲死  
望望江水湔塵泥故書一束手自携汴兒跳梁翠女啼  
出門疾走勿反顧正恐五鬼從之西馬中豈是無龍媒  
世人徒知牝牡黃與驪只如黃金絡頭亦不惡誰謂茅  
索能相羈天公醉着百不問汝偶而偶奇而奇前途兀  
兀黑於漆昨日把笏今扶犁乃知世間倚伏不可料井  
底容有青雲梯春風兩淮多鼓鼙軍中少年舞荒鷄因

君南望一大笑落日澹澹青山低

湧金亭示同游諸君

太行元氣老不死上與左界分山河有如巨鼇昂頭西  
入海突兀已過餘坡陀我從汾晉來山之面目腹背皆  
經過濟源盤谷非不佳烟景獨覺蘇門多湧金亭下百  
泉水海眼萬古留山阿鬐沸灤水源齋淪晉溪波雲雷  
涵鬼物窟宅深蛟鼉水妃簸弄明月璣地藏發泄天不  
訶平湖油油碧於酒雲錦十里翻風荷我來適與風雨會

世界三日漫兜羅山行不得山北望空長哦今朝一掃  
衆峰出千鬟萬髻高峩峩空青斷石壁微茫散烟蘿山  
陽十月未搖落翠蕤雲旂相盪摩雲烟故為出濃淡魚  
鳥似欲留婆婆石間仙人迹石爛迹不磨仙人去不返  
六龍忽蹉跎江山如此不一醉拊掌笑煞孫公和長安  
城頭烏尾訛并州少年夜枕戈舉杯為問謝安石蒼生  
今亦如卿何元子樂矣君其歌

南冠行

南冠纍纍渡河關畢逋頭白乃得還荒城雨多秋氣重  
顏垣敗屋深茅管漫漫長夜浩歌起清涕曉枕留餘潛  
曹侯少年出紉綺高門大屋垂楊裏諸房三十侍中郎  
獨守殘編北窓底王孫上客生光輝竹花不實鵲鷄飢  
絲桐切切解人語海雲喚得青鸞飛梁園三月花如霧  
臨錦芳華朝復暮阿京風調阿欽才暈碧裁紅須小杜  
長安張敞號眉嫵吳中周郎知曲悞香生春動一詩成  
瑞露靈芝滿窓戶魚龍吹浪三山沒萬里西風入華髮

無人重典鸛鷖裘展轉空床卧秋月寶鏡埋寒灰鬱鬱  
萬古不可開龍劍出地底青天白日駟雲雷層冰千里  
不可留離魂楚些招歸來生不願朝入省暮入臺願與  
竹林嵇阮同舉杯郎食猩猩唇妾食鯉魚尾不如孟光  
案頭一杯水黃河之水天上流何物可煮人間愁撐霆  
裂月不稱意更與倒翻鸛鷖洲安得酒船三萬斛與君  
轟醉太湖秋

醉後走筆

建茶三盃冰雪香離騷九歌日月光腰金更騎揚州鶴  
雋永不羨大官羊短燈檠子移近床秋風吹簾月轉廊  
一歌再歌魂魄動入眼渺渺橫沅湘湘妃漸遠望不及  
金支翠蕤澹飛颺漁父話獨醒孺子歌滄浪山鬼獨一  
脚拊掌笑我旁湘纍歸來弔故國遺臺老樹山蒼蒼掩  
書一太息夜如何其夜未央東家女兒綉羅裳銀瓶瀉  
酒勸客嘗一酌均跼顏再酌齊彭殤宇宙不今古氣節  
無陰陽少年避酒不肯喫跬步乃有無何鄉愛茶愛書

死不徹乃以冰炭貯我腸世間唯有麩生風味不可忘

南湖先生雪景乘驪圖

并引

南湖先生原武人年二十許時曾以鄉賦兩魁  
鄭州然其資倜儻所以自望者甚高終不樂為  
舉子計即棄去學擊刺當正隆征南頗欲馳逐  
戎行間既而大定詔書下兵各罷歸先生抱利  
器而無所試乃浮湛里社以詩酒自娛買田南  
湖之上築亭種樹徜徉乎其間盡置家事日與

賓客酣飲歌管綦縶窮日夕不少休家故饒財  
又好施與其赴人之急猶疾痛之在已故人尤  
以此歸之所與游如臨洺王逸賓游宗之大定  
劉之昂其人皆天下名士至論人物必曰靖達  
卿今日之奇男子也先生生於天會初歷大定  
明昌泰和優游於太平和樂之世者五十年大  
安兵興乃下世平生喜作詩樂府尤有蘊藉觀  
西子棄瓢詩可見也

髮鬢蕭颯  
吳越兵爭  
竟何



得風流翰  
與五湖舟

嘗雪中騎青驪行京水道中作長詩

卒章有安得西都畫史吮筆出新意寫作南湖

老子雪景乘驪圖之句其子文煒北渡後來東

平始以先生之意追畫此圖求僕賦詩文煒質

直好義讀書作文有聲時輩中觀其子可以想

見先生之為人故為道其事并以致懷賢之思

大河茫茫白連空寒雲迢迢度南鴻汴梁高樓管絃裏

成臯行人西北風北風吹雪來飄瞥捲孤蓬異色變慘

澹元氣開洪濛襄陽潮陽詩境在掇拾物色真難工青  
驪誰此游望見知是南湖翁南湖翁少日骯髒今龍鍾  
猶能吐氣萬丈如長虹閉門兀坐意不愜要看銀海翻  
魚龍寶華世界瓊瑤宮江山隨翁入清雄詩成仰天一  
大笑飛花落絮春濛濛鬱鬱梁宋郊翁家出強宗許與  
必豪右收入等候封收音去聲翁年十八九弄筆學彫蟲疊  
取兩解魁隱隱何隆隆一旦拂衣去學斂事猿公正隆  
適南征疋馬走從戎墨瓦磨楯鼻意與江流東紫微出

東方淮海亦來同都將書與劍田間就春農仕宦不作  
邠曼容醉鄉自愛王無功鷄鵠從渠致鐘鼓野鶴豈合  
棲樊籠南湖煙景多魚鳥亦從容亦有兩小船綸竿挿  
舡蓬高亭出秀樾窻戶連青紅清飈隨睡興暝色赴吟  
筇門前車馬來日釀日不供但苦佳客少焉知清興終  
看翁棄瓢詩調戲鷗夷老子如兒童雄吞已覺雲夢小  
寒縮寧作書生窮當年我得奉談笑晝夜肯放清樽空  
東家西家不相從南海北海不相逢風流耆舊今誰似

惆悵相看是畫中

癸卯歲杏花

南州景氣煖杏花見紅梅讀書山前二月尾向陽杏花  
全未開待開竟不開怕寒貪睡嗔人催愛花被花惱不  
徹一日遶樹空千回牙牙嬌語山櫻破稠開成團稀作  
顆小蕾從教絳蠟封繁枝未要晴雲裹兩月不舉酒半  
歲不作詩更教古銅餅子無一枝綠陰青子長相思今  
年閏年好寒節花開不妨遲一月

留舡買魚作寒節宋  
方舟先生李知幾語

題劉紫微堯民野醉圖

蒼苔濁酒同歌呼白鬚紅頰醉相扶堯時皇質未全散  
不論朝野皆歡虞望雲雲非雲就日日非日先秦迂儒  
強解事極口譽堯初未識堯民與酒同一天此外更誰  
為帝力仙老曾經甲子年戲將陳迹畫中傳山川淳樸  
忽當眼迴望康衢一慨然不見只今汾水上田翁鞭背

出租錢

堯甲子年仙  
人張果事

贈荅趙仁甫

仁甫名復雲夢  
人江表奇士也

我友高御史愛君曠以真昨朝識君面所見勝所聞江  
國辭客多玉骨無泥塵軒昂見野鶴過眼無雞羣想君  
夜醉潯陽時明月對影成三人散着紫綺裘草裹烏紗  
巾浩歌魚龍舞水伯不敢嗔何意醉夢間失脚墮燕秦  
萬世一旦暮萬里猶比隣世無魯連子黑頭萬螳徒紛  
紛君居南海我北海握手一盃情更親老來詩筆不復  
神因君兩詩發興新都門回首一大笑袖中知有江南  
春

下黃榆嶺

北厓玄武暮黥黑如積鐵東厓劫火餘絢爛開錦纈就  
中嶺頭一峰凸樸奇剝費寒雲幾千疊摩圍可望不可  
到青壁無梯猿叫絕林煙日射彩翠新跬步疑有黃金  
闕畫工胸次墨汁滿那得冰壺貯秋月直須潮陽老筆  
迴萬牛露頂張顛揮醉帖石門細路無澗泉行人飢渴  
挽不前辛苦黃榆三十里豈知却有看山緣

駢豬行

黃臺張氏庄作

汾山蒔苗多費力辦與豪豬作糧食草庵架空尋丈高  
擊板搖鈴閤終夕孤犬無猛噬長箭不暗射田夫睡中  
時叫號不似駢豬似稱屈放教田鼠大於兔任使飛蝗  
半天黑害田爭合到渠邊可是山中無橡木長牙短喙  
食不休過處一抹無禾頭天明壠畝見狼藉婦子相看  
空淚流旱乾水溢年年有會計收成纔什一資身百備  
粟豆中儋石都能幾錢直兒童食糜須愛惜此物羣豬  
口中得縣吏即來銷稅籍



嘯臺感遇

裴回五岩上，浩歌彌激烈。望望蟾房翁，倒影乍明滅。地  
古足靈異，祠廢餘像設。子規夜啼山竹裂，老鶴亂踏枯  
松折。嘯臺音響杳不聞，蕩蕩青天一明月。荒山破瓦色  
十步九窪壘，水泉出沮洳。一綫僅不絕，翁乎何意留。此  
居可是他山無，地穴大道既下衰。日鑿聰明開玉從，珪  
璋毀木以青黃。災天和散不留去，浪無東迴咄咄此老  
蒼。骭屨仰怪魁堯年，生甲子含德如未孩。標枝野鹿致

足樂火倉屋居良所哀史筆亦厚誣何曾校計識與材  
纏身正有一丈髮直以何物觀形骸大笑黃冠師金丹  
羽化之說何從來豈知大人先生獨立萬物表太古元  
氣同胚胎不見今日孫公和橫絕四海隘九垓嵇康養  
生安在哉

水簾記異

癸卯九月四日  
同杜仲梁賦

黃華絕境探未窮道人曾約山櫻紅鏡臺懸流不易得  
世俗名取香爐峰七年長路今一到刺鯁欲滿平生胃

豈知旱久泉脉絕快意一濯無由供神明自足還舊觀  
湧浪爭敢徵靈通何因狡獪出變化勝概轉盼增清雄  
天孫機絲拂夜月佛界珠網搖秋風稱奇叫絕喜欲舞  
恨不百繞青芙蓉銀橋清涼巔玉鏡崧丘東世外果無  
物邂逅乃一逢書生眼孔塞易破勺水已復誇神功東  
坡拊掌應大笑不見蟄窟鞭魚龍

硤谷聖燈

九月五日作

金門寺前山突起井底寶巖三十里舊聞聖燈在山上

紫微侍郎宜不妄山空月黑無人聲林間宿鳥時一鳴  
游人燒香仰天立不覺紫烟峰頭一燈出一燈一燈續  
一燈山僧失喜見未曾金繩脫串珠散迸玉丸走杵光  
不定飛行起伏誰控搏華麗清圓自殊勝北荒燭龍開  
晦冥南極入地多異星豈知心光毫相有真遇物外恍  
惚終難憑腐儒心魄為動蕩再拜中庭謝靈貺何曾辦  
作劉更生下照乃辱青藜杖昨朝黃華瀑流神所憐今  
朝金門佛燈佛作緣紛紛世議何足道盡付馬耳春風

前

食榆莢

露葵滑寒羊蕨羶春榆作莢絕可憐榆令人瞑何暇計  
田舍年例須濃煎簫聲吹暖賣餚天家人鑽火分青烟  
長鉤矮籃走童稚頃刻綠萍堆滿前炊飯雲子白剪韭  
青玉圓一杯香美薦新味何必烹龍炮鳳誇肥鮮鼠肝  
蟲臂萬化途神奇腐朽相推遷夢中鸚鵡亦大樂隨意  
飲啄真飛僊先生捫腹一莞然此日何功食萬錢

李峪園亭看雨

龍山右脇松十里細路蜿蜒繞龍尾松林迫塞悶煞渠  
北望玉泉疑井底玉泉元自別一天眼界廓廓無神川  
金城百里纔一俯半尖浮圖插蒼烟行行下絕巘招提  
忽當眼未到倦不勝小憇遂忘返玉泉一杯甘以冽未  
須張陸誇冰雪主人不在客不留烈風崖下風颼颼石  
頭路滑馬蹄怯山雨未落雲先愁將軍林園永安下秋  
霽村墟絕瀟洒濃雲壓屋風打頭僅得羈御脫疲馬只

知龍山之神神更神永安亦能撼詩人晦暝變化千萬  
態畫出風雨元非真山靈亦愁歸後夜半面時時見雲  
罅天瓢細洒供晚涼不似草堂迴俗駕層陰一掃羣峰  
出一洗深青徹山骨夕陽展放紫翠屏只欠松梢一輪  
月山中一石迴萬牛況是一壑復一丘不如一詩招將  
入南州先生興來時卧游

游龍山

巢子魏大梁得交此州雷與劉自聞兩公誇南山每恨

南海北海風馬牛老龍面目今日始一見更信造物工  
雕鏤是時山雨晴平田綠油油並山涼氣多況得通深  
幽山泉谷口出迎客石罅擊琳琅球蜿蜒入微行漸  
覺藤蘿窅衣樹打頭惡木拉颼棲直幹比指稠石門無  
風白日靜自是林響寒颼颼一峰忽當眼仰看看不休  
一峰一峰千百峰雖欲一一顧揖知無由金城偃蹇不  
得上瑤壑回合如相留苔花萬錦石丹碧爛不收天闕  
守虎豹武庫開戈矛小山隨起隨偃仆獨立千仞絕頂



縹緲之飛樓百崗頭藉草坐瀟洒正值金蓮秋亭亭  
妙高臺玉斧何年修登高攬元化快如鷹脫鞵山靈故  
為作開闔巧與詩境供冥搜白雲何許來纖絲弄輕柔  
蓬蓬作霧湧飄飄與煙浮玉衣仙人鞭素蚪翕忽變化  
令人愁須臾視六合浩蕩不可求初疑陶軒此運甓今  
悟夜壑真藏舟劫石拂未窮祀國浪自憂斷鰲立極萬  
萬古爭遣起滅如浮漚快哉萬里風一掃天四周誰言  
太始再開闔日馭本自無停輶舉手謝山靈就無清涼

毫相非神羞賤子貪名山客刺已屢投黃華挂鏡臺天  
壇避秦溝太山神明觀二室汗漫游胷中隱然復有此  
大物便可揮斥八極隘九州玉峯有佳招絕唱須一酬  
為君探囊擲下珊瑚鉤白雲相望空悠悠異時華表見  
老鶴姓字莫忘元丹丘

醉中送陳季淵

寒食不數日天氣殊未佳翩翩金門客行行指龍沙朝  
發忻城暮隴頭隴頭地寒無草芽拂雲堆邊春更晚雪

花茫茫楊白花紆千山高凍煞雀榆葉離離小藂薄愛  
君只欲苦死留不道南飛何所樂書生弓馬能幾何乃  
今寶校金盤陀孔璋文筆妙天下敕勒不數陰山歌向  
年賦奇雨擁海駟雲筆頭注快如懷素書布障狂笑劉  
叉寫冰柱李汾王鬱俱灰塵天意乃在潞陽陳舌吐萬  
里唾一世眼高四海空無人殘民假息仍瘡痍誰作東  
山謝安起恨我不比長桑君一月觴君上池水眼中之  
人不易忘誰作冰炭置我腸衰顏明鏡兩寂寞別意春

江誰短長但願年年見顏色與君連日醉壺觴

送弋唐佐還平陽

我從商餘之山過庵羅聞君六經百家富研摩會撮上  
指冠巍我豈肯俯首春官科覃懷變生十載後我時避  
兵方北走通家弋宋共有無行輩許之為老友晉州一  
書君肯來握手大笑心顏開春風看人不覺醉快卷更  
須三百杯鶴骨騫飛法當壽況是丹房藥鏡留心久崑  
崙神泉浸术芝乞與餘膏潤衰朽天府學士登瀛洲松

頂仙人垂直鉤愛君直欲抵死留自言世事非所求千古黃金鑛中淚不獨盧仝并馬異蘇州韋郎交分深香山白傅金玉音借渠兩詩寫我心相知非不多但苦心不同同心一人去坐覺長安空離愁何從生生從情愛中不見行路人拂袖自西東汾流滔滔兮日千里青眼高歌吾老矣

寶豐山中有庵羅寺唐佐嘗從程內翰天益問學於此

游泰山

泰山天壤間屹如鬱蕭臺厥初造化手辦此何雄哉天

門一何高天險若可階積蘇與累塊分明見九垓扶搖  
九萬里未可誣齊諧秦皇憺威靈茂陵亦雄材翠華行  
不歸石壇滿蒼苔古今一俯仰感極令人哀是時夏春  
交紅綠無邊涯奇探忘去聲登頓意愜自遲回惜無賞心  
人懽然盡餘杯夜宿玉女祠崩奔湧雲雷山靈見光怪  
似喜詩人來雞鳴登日觀四望無氛霾六龍出扶桑翻  
動青霞堆平生華嵩遊茲山未忘懷十年望齊魯登臨  
負吟鞵孤雲拂層崖青壁落落實雲間開眼前有句道不

得但覺曾次高崔巍徂萊山頭喚李白吾欲從此觀蓬萊

付阿耽誦

昨得商子書知有阿耽名今朝見阿耽驚喜喜復驚迺翁雅望傾漢廷仕才千石埋九京我知渠孫不虛生虎穴生虎子墮地骨骼成舉頭為城尾為旌幾人雄猛得寧馨繡衣青春佳御史路人望見且行止老夫從旁當說似前日晦道堂前小兒子雷動風行自應耳黎藿不

采今其始



遺山集卷五

欽定四庫全書

遺山集卷六

金 元好問 撰

樂府

天門引

秦王深居不得近從破衡成欲誰信白頭游客困咸陽  
憔悴黃金百斤盡海中仙人黃鵠舉大笑人間爭腐鼠  
丈夫何意作蘇秦六印才堪驚兒女古來多為虛名老  
不見阿房淨如掃千年虎豹守天門一日牛羊卧秋草

蛟龍引

古劍咸陽墓中得挾開青雲見白日蛟龍地底氣如虹  
土花千年不敢蝕洪鑪烈焰初騰精橫海已覺無長鯨  
世上元無倚天手匣中誰解不平鳴割城恨不逢相如  
佐酒恨不逢朱虛尚方未入朱雲請盟槃合與毛生俱  
誰念田文坐中客只將彈鋏嘆無魚

湘夫人詠

木蘭芙蓉滿芳洲白雲飛來北渚遊千秋萬歲帝鄉遠

雲來雲去空悠悠秋風秋月沅江渡波上寒烟引輕素  
九疑山高猿夜啼竹枝無聲墮殘露

湘中詠

楚山鶴鳴風雨秋楚岸猿啼送客舟江山萬古騷人國  
猿鳥無情也解愁西北長安遠於日憑君休上岳陽樓  
孤劍詠

鬱鬱重鬱鬱夜半長太息吟成孤劍詠門外山鬼泣清  
霜稜稜風入骨殘月耿耿燈映壁君不見一飢縛壯士

僵卧時自惜黃鵠一舉摩蒼天誰念樊籠束脩翼

渚蓮怨

阿溪何許來素面浣風雨寂寞烟中魂依依欲誰語

芳華怨

娃兒十八嬌可憐亭亭裊裊春風前天上仙人玉為骨  
人間畫工畫不出小小油壁車軋軋出東華金縷盤雙  
帶雲裾踏鴈沙一片朝雲不成雨被風吹去落誰家少  
年豈無恩澤侯金鞍綉帽亦風流不然典取鷓鴣裘四

壁相如堪白頭金谷樓臺悄無主燕子不來花着雨只  
知環珮作離聲誰向琵琶得私語無情鵲鵲翡翠兒有  
情蜂雄蛺蝶雌勸君滿酌金屈卮明日無花空折枝

後芳華怨

江南破鏡飛上天三五二八清光圓豈知汴梁破來一  
千日寂寞菱花仍半邊白沙漫漫車轆轤鷄絃中杜  
鵲哭塞門憔悴人不知枉為珠娘怨金谷樂府初唱娃  
兒行彈碁局平心不平只今雄蜂雌蝶兩不死老眼天

公如有情白玉搔頭綠雲髮玫瑰面脂透肉滑春風着  
人無氣力不必相思解銷骨落花絕品姚家黃揚州銀  
紅一國香千園萬繞看不足雨打風吹空斷腸丹砂萬  
年藥金印八州督不及秦宮一生花裏活長門曉夕壽  
相如儘著千金買痛渴

結楊柳怨

長樂坡前一杯酒鄭重行人結楊柳可憐楊柳千萬枝  
看看盡入行人手輕烟細雨綠相和惱亂春風態度多

路人愛是風流樹無奈朝攀暮折何朝攀暮折何時了  
不道行人暗中老素衣今日洛陽塵白髮明朝塞城草  
柳色年年歲歲青關人何事管離情春風誰向丁寧道  
折斷柔條莫再生

秋風怨

碧瓦高梧響疎雨坐倚薰籠時獨語守宮一着死生休  
狗走鷄飛莫為女雲間簫鼓夜厭厭禁漏誰將海水添  
一春門外羊車過又見秋風拂翠簾揔把丹青怨延壽



不知猶有竹枝鹽

歸舟怨

渡頭楊柳青復青  
閨中少婦動離情  
只從問得狂夫處  
夜夜夢到洛陽城  
南風吹櫓聲  
北鴈鳴嚶嚶  
江流望不極  
相思春草生

征人怨

瀚海風烟掃易空  
玉關歸路幾時東  
塞垣可是秋寒早  
一夜清霜滿鏡中

塞上曲

平沙細草散羊牛一簇征人在戍樓  
忽見隴頭新鴈過一時迴首望南州

西樓曲

游絲落絮春漫漫西樓曉晴花作團  
樓中少婦弄瑤瑟一曲未終坐長嘆  
去年與郎西入關春風浩蕩隨金鞍  
今年疋馬妾東還零落芙蓉秋水寒  
并刀不剪東流水湘竹年年露痕紫  
海枯石爛兩鴛鴦只合雙飛便雙死

重城車馬紅塵起  
乾鵲無端為誰喜  
鏡中獨語人不知  
欲插花枝淚如洗

後平湖曲

越女顏如花  
吳兒潔如玉  
天教並牆居  
不着同被宿  
美人一笑千黃金  
連城不博百年心  
樓上牆頭無一物  
暮  
變朝春一生足  
秋風拂羅裳  
秋水照紅粧  
舉頭見郎至  
低頭采蓮房  
郎心只如菱刺短  
妾意未覺藕絲長  
與郎  
期何許  
眼礙同舟女  
春波澹澹無盡情  
雙星盈盈不得

語十里平湖艇子遲岸花汀草伴人歸鴛鴦驚起東西  
去唯有蜻蜓接翅飛

洧川行

洧川道邊日欲西誰家少婦掩面啼漫漫長路行不徹  
粉綿鏡衣手自携自言娼家女家在梁門東夫婿輕薄  
兒新人不相容憶初在家時只辦放嬌慵爺娘惜女如  
惜玉近前細看面發紅無端嫁作蕩子婦流落棄擲風  
埃中可憐桃李花顏色嬌蒙茸朝看花枝好暮看花枝

空安得明珠三百斛重簾複幕圍春風

長安少年行

黃衫少年如玉筆生長侯門人不識道逢豪客問姓名  
袖把金鞭側身揖卧馳行橐錦帕蒙石榴壓漿銀作筒  
八月蒼鷹一片雪五花驕馬四蹄風日暮新豐原上獵  
三更歌舞灞橋東

黃金行

王郎少年詩境新氣象慘澹含古春筆頭仙語復鬼語

只有溫李無他人天公著詩貧子身子曾不知乃自神  
人間不買詩名用一片青衫衡霍重兒貧女富母兩心  
何論同袍不同夢入門喚婦不下機淚子垢面兒啼飢  
君詩只有貧女謠何曾夢見金縷衣外家翁媼日有語  
嫁女書生徒爾為昆陽城下三更酒醉膽輪囷挿星斗  
一昔詩腸老蛟吼十尺長人墮車走斫頭不屈三萬言  
欲向何門復低首何人壽我黃金千使君破鏡飛上天

隋故宮行

渭川楊柳先得春二月鶯啼百轉新  
長春宮中千樹錦  
暖日晴雲思煞人  
君王半醉唱吳歌  
絳仙起舞顰翠蛾  
吳兒謾說曾行樂  
三十六宮能幾多  
千秋萬古金銀闕  
海沒三山一毫髮  
繁華夢覺人不知  
留得寒螿泣秋月

解劍行

古劍黑於漆  
鬱鬱動星文  
摩挲二十年  
今日持贈君  
長鯨鼓浪三山沒  
知君不是泥中物  
袖間一卷白猿書  
未分持刀買黃犢  
壯懷風雲鬱沉沉  
慚媿漂母無千金  
長

安侏儒飽欲死萬古不解天公心北風浩浩吹行客隴  
水無聲雪花白荆卿墓頭秋草乾擊筑行歌欲誰識君  
不見秦相五穀皮去時烹雞炊糜庖又不見敝裘蘇季  
子合從歸來印累累丈夫墮地自有萬里氣翕忽變化  
安能知大冠如箕望吾子富貴同生亦同死

征西壯士謠

三十未有二十強手內蛇矛丈八長搃為官家金印大  
不怕百死向沙場捉却賀蘭山下賊金鞍綉帽好還鄉



望雲謠

涉江采芙蓉芙蓉待秋風登山采蘭若蘭若霜早彫美  
人亭亭在雲霄鬱搖行歌不可招湘絃沉沉寫幽怨愁  
心歷亂如曳璽金支翠蕤紛在眼春草迢迢春波遠

望歸吟

塞雲一抹平如截塞草離離卧榆葉長城窟深戰骨寒  
萬古牛羊飲冤血少年錦帶佩吳鉤獨騎疋馬覓封侯  
去時只道從軍樂不道關山空白頭北風吹沙雜飛雪

弓絃有聲凍欲折寒衣昨夜洛陽來腸斷空閨搗秋月  
年年歲歲望還家此日歸期轉未涯誰與南州問消息  
幾時重拜李輕車

梁園春五首

車駕還汴  
京後作

軍從南去三迴勝雪自冬來二尺強今歲長春多樂事  
內家應舉萬年觴

長春德陵  
誕節名

暖入金溝細浪添津橋楊柳綠纖纖賣花聲動天街遠  
幾處春風揭綉簾

上苑春濃晝景閑  
綠雲紅雪擁三山  
宮牆不隔東風斷  
偷送天香到世間

樓觀沉沉細雨中  
出墻花木亂青紅  
朱門不解藏春色  
燕宿鶯喧處處通

雙鳳簫聲隔綵霞  
宮鶯催賞玉谿花  
誰憐麗澤門邊柳  
瘦倚東風望翠華

龍德宮有玉谿館  
麗澤燕都西門名

探花詞五首

禁裏蒼龍啓九關  
殿前鸚鵡喚新班  
沉沉綠樹鞭聲遠

嫋嫋薰風扇影閑

浩蕩春風入綉鞍可憐東野一生寒  
皇州花好無人管  
不用新郎走馬看

六十人中數少年風流誰占探花筵  
阿欽正使才情盡

猶欠張郎白玉鞭

李欽用二十七張夢祥少一歲又未婚云

美酒清歌結勝游紅衣先為渚蓮愁  
曲江共說櫻桃宴  
不見西園風露秋

人物風流見藹然逼人佳筆已翩翩  
龍津春色年年在

莫着新銜惱必先

獵城南

翩翩游俠兒白馬如足練朝出城南獵暮趣軍中宴北  
平有真虎愛惜腰間箭

春風來

春風來時瑤草芳綠池珠樹宿鴛鴦春風去後瑤草歇  
來鴻去燕遙相望鴛鴦不得雙燕鴻天一方娟娟愁眉  
色靜與遙山長錦衾復羅薦夢語相思怨月明烏夜啼

空閨淚如霰

幽蘭

仙人來從舜九疑辛夷為車桂作旂  
䟽麻導前杜若隨披猖芙蓉散江離  
南山之陽草木腓澗崗重複人迹希  
蒼崖出泉懸素霓儵然獨立風吹衣  
問何為來有所期歲云暮矣胡不歸  
鈞天帝居清且夷瑤林玉樹生光輝  
自棄中野誰當知霰雪慘慘清入肌  
寸根如山不可移雙廩不返夷叔飢  
飲芳食菲尚庶幾西山高高空巖

薇露繁無人薦湘纍山鬼切切雲間悲空山月出夜景  
微時有彩鳳來雙栖

梅華

去歲梅華晚今歲梅華早和羹要佳實春風莫草草

寶鏡

寶鏡掛秋水青娥紅粉粧春風不相識白地斷肝腸

續小娘歌十首

吳兒汭路唱歌行十十五和歌聲唱得小娘相見曲

不解離鄉去國情

北來游騎日紛紛  
斷岸長堤是陣雲  
萬落千村藉不得  
城池留着護官軍

山無洞穴水無船  
單騎驅人動數千  
直使今年留得在  
更教何處過明年

青山高處望南州  
漫漫江水遶城流  
願得一身隨水去  
直到海底不迴頭

風沙昨日又今朝  
踏碎鵝頭路更遙  
不似南橋騎馬日



生紅七尺繫郎腰

鴈鴈相送過河來人歌人哭鴈聲哀鴈到秋來却南去  
南人北渡幾時迴


竹溪梅塢靜無塵二月江南烟雨春傷心此日河平路  
千里荆榛不見人

太平婚嫁不離鄉楚楚兒郎小小娘三百年來涵養出  
却將沙漠換牛羊

飢鳥坐守草間人青布猶存舊領巾六月南風一萬里

若為白骨便成塵

黃河千里扼兵衝  
虞虢分明在眼中  
為向淮西諸將道  
不須誇說蔡州功



遺山集卷六